

Հաստատված է  
«Հայաստանի պետական տնտեսագիտական  
համալսարան» պետական ոչ առևտրային  
կազմակերպության գիտական խորհրդի  
2023 թվականի դեկտեմբերի 22-ի N 6 - 5 որոշմամբ,  
գիտական խորհրդի նախագահ, ռեկտոր

  
  
Ռ. Ռ. Գալոյան  
22 դեկտեմբերի 2023 թ.

#### ԿԱՐԳ

### ՀԱՅԱՍՏԱՆԻ ՊԵՏԱԿԱՆ ՏՆՏԵՍԱԳԻՏԱԿԱՆ ՀԱՄԱԼՍԱՐԱՆԻ ԱՇԽԱՏԱԿԻՑՆԵՐԻՆ, ԱՄՊԻՐԱՆՏՆԵՐԻՆ ԵՎ ՀԱՅՅՈՐԴՆԵՐԻՆ SCOPUS ԳԻՏԱՏԵՂԵԿԱՏՎԱԿԱՆ ՇՏԵՄԱՐԱՆՈՒՄ ԸՆԴԳՐԿՎԱԾ ՀՐԱՊԱՐԱԿՈՒՄՆԵՐԻ ՀԱՄԱՐ ՀՈՆՈՐԱՐՆԵՐ ՏՐԱՄԱԴԻԵԼՈՒ

#### 1. ԸՆԴՀԱՆՈՒՐ ԴՐՈՒՅԹՆԵՐ

1. Հայաստանի պետական տնտեսագիտական համալսարանի (այսուհետ՝ համալսարան) աշխատակիցներին, ասպիրանտներին և հայցորդներին Scopus գիտատեղեկատվական շտեմարանում ընդգրկված ամսագրերում հրապարակումների համար հոնորարներ տրամադրելու կարգը (այսուհետ՝ կարգ) թխում է «Հայաստանի պետական տնտեսագիտական համալսարանի 2020-2024 թթ. գիտահետազոտական գործունեության զարգացման ռազմավարական ծրագրի» և «Հայաստանի պետական տնտեսագիտական համալսարանի 2021-2026 թթ. «Բաց գիտության» ռազմավարության» պահանջներից և որդեգրած քաղաքականությունից:

2. Սույն կարգի նպատակն է խթանել համալսարանի աշխատակիցների, ասպիրանտների և հայցորդների գիտահետազոտական գործունեության ակտիվության բարձրացումն ու հրապարակումները Scopus գիտատեղեկատվական շտեմարանում ընդգրկված ամսագրերում՝ նպաստելով համալսարանի, ինչպես նաև համալսարանի ակադեմիական կազմի վարկանիշի և միջազգային ճանաչելիության բարձրացմանը:

3. Սույն կարգով սահմանվում են Scopus գիտատեղեկատվական շտեմարանում ընդգրկված հրապարակումների համար համալսարանի աշխատակիցներին, ասպիրանտներին և հայցորդներին հոնորար տրամադրելու պայմանները և կարգը:

## **2. SCOPUS ԳԻՏԱՏԵՂԵԿԱՏՎԱԿԱՆ ՇՏԵՄԱՐԱՆՈՒՄ ԸՆԴԳՐԿՎԱԾ ԱՄՍԱԳՐԵՐՈՒՄ ՀՐԱՊԱՐԱԿՎԵԼՈՒ ՀԱՄԱՐ ՀՈՆՈՐԱՐՆԵՐ ՏՐԱՄԱԴՐԵԼՈՒ ՊԱՅՄԱՆՆԵՐԸ ԵՎ ՊԱՀԱՆՋՆԵՐԸ**

4. Հոնորարը տրամադրվում է համալսարանի աշխատակիցներին, ասպիրանտներին և հայցորդներին Scopus գիտատեղեկատվական շտեմարաններում ընդգրկված ամսագրերում փաստացի հրապարակված (էլեկտրոնային և (կամ) թղթային) և ինդեքսավորված յուրաքանչյուր գիտական հրապարակման համար:

5. Հոնորարը տրամադրվում է, եթե Scopus գիտատեղեկատվական շտեմարանում հրապարակված աշխատություններում համալսարանը նշված է որպես հեղինակի աշխատավայր և (կամ) ուսման վայր (affiliation):

6. Հեղինակին (հեղինակներին) հոնորար տրամադրվում է 300.000 (երեք հարյուր հազար) ՀՀ դրամի չափով՝ առանց հարկերի և պարտադիր այլ վճարների:

7. Համալսարանի աշխատակից հանդիսացող համահեղինակների առկայության դեպքում տրամադրվող հոնորարի գումարը հավասարաչափ

բաժանվում է համահեղինակների միջև: Համալսարանի աշխատակից չհանդիսացող համահեղինակներին հոնորար չի տրամարվում:

8. Հոնորարը ստանալու համար հեղինակը (հեղինակները) գիտական աշխատության փաստացի հրապարակումից և ինդեքսավորումից հետո պետք է եռամսյա ժամկետում ռեկտորին ներկայացնի (ներկայացնեն) դիմում և անհրաժեշտ տեղեկատվությունը (ցանկը կցվում է): Դիմումն ու անհրաժեշտ տեղեկատվությունը կարող են ներկայացվել նաև էլեկտրոնային եղանակով:

9. Ռեկտորի հանձնարարությամբ գիտության բաժինը ստուգում է գիտական աշխատության հեղինակի (հեղինակների) կողմից ներկայացված դիմումում նշված տվյալների իսկությունը, հավաստում է հրապարակման ինդեքսավորված լինելու փաստը, համապատասխանությունը սույն կարգով նախատեսված պահանջներին և համապատասխան զեկուցագիր է ներկայացնում ռեկտորին հոնորար վճարելու վերաբերյալ:

Սույն կետում սահմանված տվյալների իսկության հավաստման և (կամ) հերքման հիմքը Scopus գիտատեղեկատվական շտեմարանների պաշտոնական կայքէջում զետեղված տեղեկատվությունն է:

10. Սույն կարգի 9-րդ կետով սահմանված պահանջներին համապատասխանելու դեպքում հոնորարը վճարվում է ռեկտորի համապատասխան հրամանով՝ դիմումի ներկայացման օրվանից տասնօրյա ժամկետում:

11. Սույն կարգի 9-րդ կետով սահմանված պահանջներին չհամապատասխանելու դեպքում դիմումը մերժվում է՝ ներկայացման օրվանից տասնօրյա ժամկետում:

12. Հոնորարի չափը ամրագրված է և կախված չէ հեղինակի (հեղինակների) պաշտոնից, գիտական աստիճանից և գիտական կոչումից:

## ՑԱՆԿ

### SCOPUS ԳԻՏԱՏԵՐԵԿԱՏՎԱԿԱՆ ՇՏԵՄԱՐԱՆՈՒՄ ԸՆԴԳՐԿՎԱԾ ՀՐԱՊԱՐԱԿՈՒՄՆԵՐԻ ՀԱՄԱՐ ՀՈՆՈՐԱՐ ՍՏԱՆԱԼՈՒ ՆՊԱՏԱԿՈՎ ՆԵՐԿԱՅԱՑՎՈՂ ՏԵՐԵԿԱՏՎՈՒԹՅԱՆ

Համալսարանի ռեկտորին ներկայացվող դիմումը պետք է պարունակի՝

- 1) հեղինակի (հեղինակների) Ա.Ա.Հ., պաշտոնը համալսարանում, հեռախոսը, էլեկտրոնային փոստի հասցեն,
- 2) գիտական աշխատության վերնագիրը, ամսագրի անվանումը և համարը (գրքի դեպքում՝ գրքի վերնագիրը), հրապարակման էջերը, տարեթիվը,
- 3) հոդվածի DOI-ն, ամսագրի ISSN-ը, իսկ մենագրության դեպքում՝ ISBN-ը,
- 4) հրապարակման հղումը,
- 5) Scopus Author ID հղումը (հղումները):